

Tim Vlade Zeničko-dobojskog kantona za borbu protiv korupcije

UPUTSTVO
ZA REVIZIJU DIPLOMA U INSTITUCIJAMA ZENIČKO-DOBOJSKOG KANTONA
(PROVJERA VJERODOSTOJNOSTI DIPLOMA)

1. Osnov za reviziju

Agencija za prevenciju i koordinaciju borbe protiv korupcije BiH (APIK) zbog konstantnog negativnog pisanja o lažnim diplomama u Bosni i Hercegovini, što dodatno negativno utiče na ionako, generalno, loše stanje u kojem se nalazi Bosna i Hercegovina kada govorimo o korupciji, kao i zbog činjenice da je postupak revizije već započeo na nekim nivoima vlasti, uputila je aktom broj: 5-50-3-1125/17 od 15.05.2019. godine Inicijativu za pokretanje revizije diploma zaposlenih u javnim institucijama svim antikorupcijskim tijelima u Bosni i Hercegovini da iniciraju proces revizije diploma za sve uposlene u tijelima i organima uprave (zavodima, agencijama) i javnim preduzećima u Bosni i Hercegovini.

Pored navedene inicijative APIK-a, osnov za reviziju je i Zaključak Vlade broj 02-06-807/19 od 16.01.2019. godine, kojim je Vlada usvojila Izvještaj o provođenju Akcionog plana za borbu protiv korupcije Vlade Zeničko-dobojskog kantona 2017.-2019.godinu, i u njegovoj tački IV. podržala neovisnost djelovanja Tima po pitanju njegovih nadležnosti, koji su od značaja za provođenje Akcionog plana, prevenciju i borbu protiv korupcije.

Smatramo bitnim navesti i Mišljenje Agencije za zaštitu ličnih podataka u vezi provjere podataka od 25.02.2019. godine u kome se ističe da su institucije, organi, ustanove, preduzeća i drugi subjekti javnog sektora, osnovani u javnom interesu i njihov rad se zasniva na principu transparentnosti. U tom smislu, određene pojedinosti o zaposlenima u javnom sektoru, kao što su kvalifikacije za obavljanje poslova na koje su raspoređeni, podliježu većoj kontroli javnosti i isti ne mogu uživati zaštitu prava na privatnost u istoj mjeri kao zaposleni u privatnom sektoru. Njihov privatni interes ne može nadjačati zakonit javni interes u pogledu vršenja kontrole kvalifikacija zaposlenih u javnom sektoru i ostvarivanja principa transparentnosti u vezi toga.

2. Metodologija (smjernice) realizacije revizije diploma

Ovo Uputstvo odnosi se na institucije Zeničko-dobojskog kantona

- javne ustanove, zavodi, direkcije i drugi organi čiji je osnivač Kanton ili se u cjelini ili djelimično finansiraju iz Budžeta Kantona, a koji nisu državna služba u smislu Zakona o državnoj službi Federacije BiH
- javna preduzeća i privredna društva ZDK sa većinskim državnim vlasničkim kapitalom ili u kojima Vlada Kantona ima upravljačka prava (u daljem tekstu: institucija)

Institucije, kao kontrolori podataka u smislu Zakona o zaštiti ličnih podataka („Službeni glasnik BiH“ broj 49/06, 76/11 i 89/11), dužne su samostalno provesti postupak detaljne revizije diploma svih uposlenih u skladu sa ovim Uputstvom.

U toku obrade podataka, institucija će selektirati obrazovne ustanove u segmentima osnovnog, srednjeg i visokog obrazovanja, od kojih će zatražiti provjeru vjerodostojnosti podataka sadržanih u svjedodžbama/diplomama, a prema obrascima koji su sastavni dio ovog Uputstva:

- a) Obrazac I. - za utvrđivanje vjerodostojnosti diploma stečenih na visokoškolskim obrazovnim ustanovama,
- b) Obrazac II. - za utvrđivanje vjerodostojnosti diploma/svjedodžbi stečenih u srednjoškolskim obrazovnim ustanovama,
- c) Obrazac III. - za utvrđivanje vjerodostojnosti svjedodžbi stečenih u ustanovama osnovnog obrazovanja.

Nakon toga, odnosno paralelno sa prikupljenim podacima institucije vrše kontrolu diploma/svjedodžbi, a svaku eventualnu sumnju na postojanje nevjerodostojne diplome posebno provjerava kod nadležnih institucija (inspekcija, policija i sl.) i o tome obavještava Tim Vlade.

U toku provođenja postupka revizije, institucije obavezno na kraju svakog mjeseca dostavljaju izvještaj Timu o izvršenim provjerama, a po okončanju revizije dostavljaju objedinjeni konačni izvještaj, koji će Tim prezentirati Vladi Zeničko-dobojskog kantona.

Podatke tražiti pozivom na već pomenuti Zakon o zaštiti ličnih podataka, te Zakon o upravnom postupku („Službene novine F BiH“, broj 02/98 i 48/99) po kome su pravna lica i institucije shodno članu 170. dužne izdavati uvjerenja, odnosno druge isprave o činjenicama u vezi sa poslovima koje u skladu sa zakonom obavljaju te institucije, kao i o činjenicama o kojima se vodi službena evidencija.

Predsjednica
Tima Vlade Zeničko-dobojskog kantona
za borbu protiv korupcije


Meliha Omerspahić